

NEHEMIA

Puna artistike: Tom Shirey

Teksti: Roy Harrison

Përkthyes: Andi Stefanllari

JU LUTEMI VINI RE!

Vizualet për këtë seri mund të blihen në pjesën më të madhe të zyrave të BUF-it dhe në dyqanet në internet. Për një listë të zyrave të BUF-it dhe dyqaneve në internet në Evropë, ju lutemi vizitoni www.teachkids.eu/al dhe kliko mbi “Vendet”.

**Bashkësia Ungjillore e Fëmijëve (B.U.F.)
Child Evangelism Fellowship (C.E.F.)
Kutia Postare 249
DURRËS
ALBANIA**



Copyright © 1990, 1997 European Child Evangelism Fellowship

Të gjitha të drejtat e rezervuara. Përdorur me leje.

Mund të riprodhohet vetëm për përdorim personal, shërbese, jofitimprurës ose jo-komercial. Vizitoni www.teachkids.eu/al për më shumë detaje mbi lejen e përdorimit.

PËRMBAJTJA

Mësimi	Faqe
1. Kupëmbajtësi me zemër të lënduar. VQ. Lutu Perëndisë në mënyrën e Tij.	5
2. Thirrja për t'u ngritur për ndërtim. 10 VQ. Zoti ka një punë që duhet ta bëjnë të krishterët.	
3. Ngritja e mureve dhe përballimi i armikut. VQ. Ji i gatshëm për të përballuar vështirësitë e krijuara nga të tjerët.	14
4. Përballimi i problemeve mes njerëzve të Zotit. VQ. Perëndia ndihmon fëmijët e Tij të jenë të mençur.	19
5. Një qytet i përkushtuar Perëndisë. VQ . Lëre Zotin të kontrollojë jetën tënde.	24

**Child Evangelism Fellowship
Bashkësia e Ungjillizimit të Fëmijëve
të Shqipërisë
Kutia Postare 249
DURRËS
ALBANIA**

Përmbledhje e Shkallëve për Këshillimin e Fëmijës Që Dëshiron të Vijnë në Gjirin e Krishtit

Sigurohuni që Fëmija Kupton Rreth:

Perëndia

Kush është Perëndia?

Perëndia krijoi. Ai flet me ne nëpërmjet Biblës.

Perëndia është i shenjtë dhe i pastër. Ai na do ne.

Mëkatin

Ç'është mëkati?

Mëkati është mosbindja ndaj urdhëresave të Perëndisë. Ai është kundër Perëndisë.

Flisni rreth mëkateve të ndryshme.

Fëmija është mëkatar.

Mëkati meriton ndëshkim.

Shpëtimtarit

Cili është Ai i vetmi që mund të heqë mëkatet?

Pse i heq Perëndia mëkatet e tua?

Perëndia Biri vdiq i kryqëzuar për mëkatarët.

Zoti Jezus u ngrit së vdekuri. Ai është sundimtari mbi gjithçka.

Shpjegoni si mund të shpëtoni:

Shpjegoni çfarë dëshiron Perëndia të bëjmë ne dhe ç'do të bëjë Ai.

Përdorni vargjet Biblike (Gjonit 1:12; 3:16; 6:37; Veprat e Apostujve 16:31; Romakëve 6:23, 10:13).

Ç'do Perëndia që të bësh ti?

Ç'do të bëjë vetë Perëndia?

Paralajmëroni rreth vështirësive që do hasen

Shtroni pyetjen: "Dëshiron të besosh Krishtin, apo do vazhdosh të presësh?"

Nxitini fëmijët të lutem me zë (nëse janë gati)

Flisni rreth Sigurisë së Shpëtimit

Rikthejuni vargjeve të Biblës që përdorët.

Flisni rreth jetës së ndryshuar.

Tregoni se ç'mund të dijë personi që i beson Krishtit.

(Më vonë) Jepni Këshilla rreth Jetës së krishter

Lexoni dhe zbatoni Biblën.

Flisni me Perëndinë, Atin tonë Qiellor.

Tregoji të tjerëve çfarë bëri Zoti për ty.

Kërkoji Perëndisë ndjesë kur mëkaton.

Tako të krishterë të tjerë.

Mbaj mend se Zoti ka premtuar: "Unë s'do të të braktis ty kurrë."

HYRJE

Rindërtimi i mureve të Jeruzalemit është një pjesë tërheqëse e historisë së popullit të Perëndisë. Muret kishin 140 vjet që ishin rrënuar. Fillimisht, pas shumë vitesh robërie në Babiloni, gati 50,000 çifutë u kthyen me Zerubabelin për të rindërtuar tempullin. Më vonë kthehet Ezdra me grupin e dytë të vullnetarëve për të rivendosur adhurimin e Jehovait. Dhe së fundi, rreth viteve 445 para Krishtit, kthehet grupi i fundit, me në krye Nehemian për të rindërtuar muret dhe portat e qytetit.

Emri Nehemia do të thotë "Perëndia ngushëllon". Perëndia përdori Nehemian të inkurajonte e të ndihmonte popullin e Tij në një mënyrë të veçantë. Pa marrë parasysh pengesat e krijuara, Nehemia dhe populli ia dolën mbanë të ndërtojnë murin e qytetit (4 km. të gjatë) brenda 52 ditëve. Në të njëjtën kohë, në qytet rivendoset jeta normale në mënyrë që të vazhdonte adhurimi i vërtetë i Perëndisë. Cili ishte sekreti? Perëndia përdori Nehemian të realizonte planin e Tij.

Libri i Nehemias, është i mbushur plot me udhëzime për rrugët si të kryhet puna e Perëndisë në mënyrën e Tij dhe për lavdinë e Tij. Këto pesë mësimet Biblike u shkruan veçanërisht për të ndihmuar fëmijët e shpëtuar, por edhe të pashpëtuarit mund të përfitojnë gjithashtu prej tyre.

Përpunimi artistik u realizua nga Tim Shirey, anëtar i departamentit të letërsisë dhe mjeteve audio-vizive në Shoqatën Evropiane Evangjeliste për Fëmijë. Lutja jonë është, që nëpërmjet këtyre mësimëve djemtë dhe vajzat të hyjnë në vullnetin e përsosur të Perëndisë për jetën e tyre - për shpëtim, shenjtërim dhe shërbim. "Sepse të gjitha gjërat që u shkruan në të kaluarën, u shkruan për mësimin tonë, që me anë të këmbënguljes dhe të ngushëllimit të Shkrimeve të kemi shpresë." (Romakëve 15:4)

Roy Harrison

ORIENTIME PËR MËSUESIN

Një e Vërtetë Qendrore jepet në çdo mësim. Po kështu jepen format e zbatimit për fëmijët e shpëtuar dhe të pashpëtuar. Shkurtime të mëposhtme jepen gjatë paraqitjes së mësimin:

VQ = Kur në mësim jepet e Vërteta Qendrore.

P = Përdoret për fëmijët e pashpëtuar.

SH = Përdoret për fëmijët e shpëtuar.

Shkrimi i së Vërtetës Qendrore në një copë letër apo në një skedë ndihmon së tepërmi.

Viheni veten në dispozicion për të dhënë këshilla. Si rezultat i mësimdhënies tuaj, fëmijë të veçantë mund të kenë pyetje rreth jetës së krishterë apo mënyrës së shpëtimit. Thuaji nxënësit se je i gatshëm ta ndihmosh. Orientojini ata si të veprojnë që të përfitojnë nga kjo ndihmë. Në disa mësimet ne kemi dhënë udhëzime si ta realizoni këtë punë. Por ju mund të jepni këshilla edhe jashtë programit të mësimin Biblik.

Më poshtë po japim një shembull se si mund t'u drejtoheni nxënësve:

"Sot në mësimin Biblik do t'ju shpjegoj se si ta besosh Krishtin si Perëndinë dhe Shpëtimtarin tënd. Nëse në fund të mësimin ke mëdyshje si ta bësh këtë dhe dëshiron ndihmën time, eja e ulu në vendet e para kur të jenë larguar nxënësit e tjerë."

Në faqen e dytë të këtij manuali do gjeni udhëzime të dobishme për këshillimin e një fëmije që do të vijë tek Krishti.

Mësimi 1

KUPËMBAJTËSI ME ZEMËR TË VRARË

Shkrimi i Shenjtë: Nehemia 1:1 -2:8.

E Vërteta Qendrore: Lutu Perëndisë në mënyrën e Tij.

Zbatimi: **I Pashpëtuari:** Kërkoj Atij të të shpëtojë nga mëkatet.
I Shpëtuari: Kushtoj kohë çdo ditë lavdërimit të Tij, rrëfe mëkatin tënd, dhe kërkoj Atij ndihmë.

Plani i mësimi:

Fillimi: Mendoje veten të zënë rob në dhe të largët.

Figura:

1. Nehemia, kupëmbajtësi i mbretit të Persisë.
Perëndia ka plan të veçantë për të dhe për ne. VQP
2. Nehemia merr vesh se muret e Jeruzalemit janë rrrënuar. VQSH
3. Ai lutet. VQSH
- lavdëron Perëndinë.
- pranon mëkatet.
- i kërkon Perëndisë ndihmë, duke u mbështetur në premtimin e Tij.
4. Ai vazhdon lutjen. VQSH
Mbreti e pyet pse është i pikëlluar dhe ç'kërkon prej tij.
Nehemia kërkon leje të rindërtojë qytetin.
5. Nehemia i kërkon mbretit letrën e lejkalimit dhe lëndë drusore.

Pika kulmore: Mbreti jep miratimin e tij.

Përfundimi: A do lutesh çdo ditë? VQSH + P

Vargu Përmendsh: "M'u drejto dhe unë do të përgjigjem." Jeremia 33:3

Mësimi

Hyrje

Përdorni hartën në fund të Figurave.

Mendoni si ishte jeta për një njeri që ka jetuar 2500 vjet më parë?

Asokohe s'kishte aeroplanë, makina, gazeta, telefona dhe TV. Dikush që ishte në dhe të huaj e kishte shumë të vështirë, sepse ai s'mernte dot asnjë lajm nga shtëpia.

Diçka tepër e trishtueshme u kish ndodhur fëmijëve të Izraelit. Ata ishin marrë robër në Babiloni.

(Mësuesi e tregon vendin në hartë.)

Pse? Sepse ata s'u ishin bindur urdhrave të Perëndisë. Ata në vend që të adhuronin Perëndinë e vërtetë dhe të gjallë ishin kthyer nga Perëndi të rreme dhe adhuronin idhuj të ndryshëm. Perëndia lejoi që ata të merren robër. Por, aty larg në dhe të

huaj zemrat e shumë vetave ndryshuan dhe ata i kërkuan Perëndisë që t'i falte. Dhe Perëndia iu përgjigj lutjes së tyre. Perëndia do që edhe ne t'i lutemi Atij. Zoti i ishte përgjigjur lutjes së popullit të Tij shumë kohë më parë. Ai mundësoi kthimin e shumë prej tyre në Jeruzalem.

(Mësuesi e tregon Jeruzalemin në hartë)

Mbreti i Persisë lëshoi një urdhër që i lejonte ata të shkonin të ndërtonin tempullin, ndërtesën ku ata adhuronin Perëndinë. Ata ishin shumë të gëzuar se më në fund do ktheheshin në vendin e tyre.

Ishte një djalë i ri që kishte lindur në Persi quhej Nehemia. Nehemia kryente një punë shumë të rëndësishme në Persi. Ai punonte në pallatin e mbretit në Shusha.

(Mësuesi e tregon atë në hartë).

Figura 1-1

Pallati në Shushan ishte shumë i bukur. Ai ishte i veshur me mermer, ar dhe argjend. Mobiliat ishin bërë nga dru i veçantë. Mbreti kishte shumë shërbëtorë dhe ushtarë që e mbronin. Nehemia ishte kupëmbajtësi i mbretit Artakserks, punë që ndoshta sot nuk tingëllon diçka e veçantë, por në atë kohë ishte një pozitë e lartë nderi. Ai provonte ushqimin dhe pijet e mbretit para se t'i shërbeheshin atij. Kjo bëhej që të mbrohej mbreti nga helmimi. Nëse kupëmbajtësi nuk sëmurej e vdiste, mbreti hante e pinte i sigurt. Kjo tregon besimin e madh që kishte mbreti te Nehemia. Mbreti fliste shpesh me të, kështu që ai dinte vendimet e rëndësishme që merreshin për perandorinë Persiane.

Perëndia po e përgatiste Nehemian për një punë edhe më të veçantë. Por fillimisht ai duhej të kryente mirë punën e tij në pallat. Perëndia ka një plan të veçantë për jetën tënde. E para gjë që Ai kërkon të bëjë në jetën tënde është të të shpëtoj nga mëkati. Ashtu si dhe hebrenjtë kohë më parë, edhe ti nuk ke zbatuar urdhrat e Perëndisë. Bibla thotë se ne duhet ta duam Perëndinë

me gjithë zemër. Por shpesh ne mendojmë më shumë për veten dhe dëshirat tona. Ne jemi gati të shpërfillim Perëndinë lidhur me vjedhjet dhe mashtrimet në se arrijmë qëllimin tonë. Prandaj duhet të besosh Jezus Krishtin. Vetëm Ai të fal mëkatet dhe të bën ashtu si duhet të jesh . Ai vdiq i kryqëzuar për të larë mëkatet e tua dhe u ngrit së vdekuri. A e kënaq jeta jote Perëndinë? Nëse e di që jo, kthehu që sot në gjirin e Tij. Lutja që Perëndia dëshiron të dëgjojë nga secili është: "O Perëndi, ji i mëshirshëm ndaj mua mëkatarit." (Lluka 18:13). Kërkoji Atij të jetë Zoti dhe Shpëtimtari yt. Ai ka premtuar se Ai nuk do refuzojë askënd që vjen tek Ai.

(shikoni Gjoni 6:37)

Nëse ke pyetje se si duhet të vish te Perëndia, të lutem më trego në fund të mësimit. Mund të vish të ulësh në një nga vendet e para. Unë do jem i lumtur të të tregoj se ç'duhet të bësh si dhe do të të njoh me premtimin e Zotit Jezus për të të shpëtuar. Është shumë e rëndësishme, prandaj të lutem, eja dhe ulu këtu pas mësimit, që të të ndihmoj.

Fugura 1 - 2

Nehemia kishte një punë të nderuar në pallat dhe punët po i shkonin për mrekulli. Por, një mëngjes dimri ai dëgjoji një lajm që e trishtoi shumë. Nga Jeruzalemi ishin kthyer në Shushan i vëllai me disa shokë të tij. Nehemia i pyeti ata: "Si janë njerëzit? Si është gjendja në Jeruzalem?" Dhe ata iu përgjigjën: "Ata që kanë shpëtuar nga robëria janë atje poshtë në krahinë, në një varfëri të madhe dhe me faqe të zezë; përveç kësaj muret e Jerezalemit janë plot me të çara dhe portat e tij të konsumuara nga zjarri." (Nehemia 1:3) Nehemia u trishtua kur mendonte se: "Pas gjithë këtyre viteve populli i Jeruzalemit ende nuk kishte mbrojtës nga armiqtë e tij. Hajdutët mund të hyjnë e të dalin kur të duan, se nuk ka dyer që t'i pengojnë ata. Prandaj njerëzit janë shkurajuar dhe kanë humbur besimin e tyre. Shtetet fqinjë po tallen me ta."

E dini se edhe unë dhe ti që sot i përkasim Zotit Jezus, mund ta gjejmë veten në të ngjashme situatë. Unë dhe ti mund të mos komunikojmë me Perëndinë dhe të jetojmë ashtu siç kërkon Ai. A ndihesh i shkurajuar në jetën tënde si i krishterë? Populli i Jeruzalemit ishte shkurajuar sepse qyteti i tyre ishte shkatërruar.

Figura 1 - 3

Cili ishte reagimi i Nehemias lidhur me lajmet për Jeruzalemin? Bibla thotë se ai "u ul dhe qau." (Nehemia 1:4) Nehemia ishte i trishtuar dhe filloi të lutej. I trishtuar nga lajmet që mori, Nehemia agjëroi për disa ditë me radhë. Lutja e Nehemias është shkruar për ne në Bibël (Nehemia 1:5-11). Është me të vërtetë një lutje e mrekullueshme. Perëndia e ka vënë këtë lutje në Fjalën, që unë dhe ti të lutemi ashtu siç dëshiron Ai - ashtu sikundër u lut Nehemia. Por si u lut Nehemia?

Fillimisht ai foli për madhësinë e Perëndisë. Ai tha, "O Zot, Perëndia i qiellit, Perëndi i madh dhe i tmerrshëm...(Nehemia 1:5) Zoti është i gjithëpushtetshëm; Ai sundon mbi të gjithë. Në fillim të lutjes së tij Nehemia foli për besnikërinë e Perëndisë në mbajtjen e premtimit për ata që e duan dhe zbatojnë urdhëresat e Tij. Unë dhe ti duhet ta adhurojmë Perëndinë ashtu sikundër bënte Nehemia. Ta lavdërojmë Atë që është kaq i madhërishtëm e besnik. Ne mund t'i besojmë Atij se do t'i përgjigjet lutjeve tona.

Pasi lavdëroi Perëndinë, Nehemia foli për mëkatet e tij dhe mëkatet e popullit. Ai tha, "Unë i pranoj mëkatet kundër Teje. Ne kemi bërë shumë prapësi dhe nuk u jemi bindur urdhërimeve që Ti dhe. (*Shiko Nehemia 1:7*)

Nehemia tha se edhe ai vetë nuk i ishte bindur Perëndisë. A je i gatshëm si Nehemia t'i thuash Perëndisë se nuk i je bindur Atij? Të gjithë ne në jetën e krishterë bëjmë prapësi. Bibla thotë se unë e ti duhet t'i lutemi Perëndisë të na falë. (*Shiko Lluka 11:4; I Gjoni 1:8,9*).

Ai premtonte të na falë mëkatet e të na pastrojë.

Vetëm pasi Nehemia lavdëroi dhe adhuroi Perëndinë, dhe pranoi mëkatet e tija, iu drejtua Atij për ndihmë. Në lutjen e tij ai përdori një premtim të cilin Perëndia e kishte dhënë shumë vite më parë nëpërmjet Moisiut. Perëndia kishte thënë se po të mëkatonin, Ai do t'i shpërndante ata nëpër kombe: por po të ktheheshin tek Perëndia e t'i bindeshin Atij, atëherë Ai do t'i mblidhte përsëri nga vendet e largëta dhe do t'i kthente ata në Jeruzalem. Kur lutemi është mirë të mendojmë për atë që ka thënë Perëndia. Kështu ne e dimë se po lutemi sipas vullnetit të Tij. Edhe unë e ti mund t'i kujtojmë Perëndisë premtimet e bëra. Nehemia nuk u lut në mënyrë të përgjithshme. Ai kërkoi në veçanti një gjë, "O Zot, të lutet Ty shërbëtori yt. Mëshiroje atë para Mbretit." (Nehemia 1:11) Ai iu lut Perëndisë që Mbreti ta favorizonte atë kur të bisedonin bashkë. Perëndia po i tregonte Nehemias se ai mund të ndihmonte popullin e tij. Dhe Nehemia ishte i gatshëm të shkonte. Lëre Perëndinë të mësojë nevojat e tua dhe tregohu i gatshëm të veprosh siç të mëson Ai.

Figura 1 - 4

Ç'lutje e mrekullueshme që ishte! Nehemia vazhdoi lutjet e tija për katër muaj me radhë. Duket një kohë e gjatë. Perëndia do që ne të vazhdojmë të lutemi, kur çdo gjë bëhet sipas vullnetit të Tij. Hera-herës ne duhet të presim një kohë të gjatë për përgjigjen e Perëndisë. Më kujtohet një njëri me emrin George (Xhorxh) Muller, i cili u lut shtatëdhjetë vjet me radhë për shpëtimin e një mikut të tij. Megjithatë nuk dukej të kishte ndonjë përgjigje. Së fundi miku i besoi Krishtit. Ai shpëtoi ditën e varrimit të George Mullerit. A je lutur për mikun tënd apo për dikë në familje që të shpëtohet? Mos hiq dorë edhe pse mund të jesh lutur për muaj apo vite me radhë. Nehemia lutej javë pas javë. Një ditë prilli ai po përgatitej t'i shërbente mbretit verë. Më parë ai gjithmonë shfaqej i lumtur para mbretit, kurse kësaj here e kishte

mbuluar trishtimi. Mbreti Artakserks e vuri re menjëherë dhe tha, "Pse ke pamje të trishtuar, ndonëse nuk je i sëmurë?" (Nehemia 2:2) Mbreti po kërkonte të gjente shkakun e pikëllimit të tij.

Nehemian e mbërtheu një frikë e madhe. Ai e dinte se nuk i lejohej të ishte i trishtuar kur ishte në prani të mbretit. Ai gjithashtu e dinte se vetë mbreti Atakserks kishte dhënë urdhër të ndalonin punimet në muret e Izraelit. (*shiko Ezdras 4:21*).

Nehemia thjesht iu përgjigj mbretit duke thënë, "Si mund të të mos jetë fytyra ime e trishtuar ku qyteti ku janë varrosur etërit e mi është shkatërruar dhe portat e tij janë konsumuar nga zjarri?" (Nehemia 2:3) Nehemia priti ç'do thoshte mbreti. A mos vallë do e dëbonte?

Perëndia po i përgjigjej lutjes dhe mbreti tha, "Çfarë kërkon?" Nehemia e kuptoi se gjithçka varej nga ç'ka do t'i thoshte mbretit. Ai pa humbur kohë i pëshpëriti Perëndisë një lutje. Pastaj ai tha, "Nëse kjo i pëlqen mbretit, më lejo të shkoj në qytetin e lindjes që ta rindërtoj atë." (*Shiko Nehemia 2:5*)

Ç'do të thoshte mbreti? A do zemërohej ai me të? A do e hidhte poshtë kërkesën e tij? Mbreti i tha Nehemias, "Sa do të zgjasë udhëtimi dhe kur do të kthehesh?" (Nehemia 2:6). Mbreti ia dha lejen e tij. Sa e habitshme! Nehemia e dinte se ishte Perëndia që e bëri këtë të mundur. Asnjë gjë nuk është e vështirë për Perëndinë. Me Të gjithçka është e mundur.

Figura 1 - 5

Nehemia e dinte se i duhej ndihma e mbretit për të shkuar në Jeruzalem për të ndërtuar muret e tij. Ai kishte menduar se ç'duhej të bënte. Ai ishte në gjendje t'i tregonte mbretit sa do zgjaste udhëtimi. Ai gjithashtu tha, "A mund të më jepen letra për qeveritarët e krahinës matanë lumit dhe një letër për mbikëqyrësin e pyllit të mbretit afër Jeruzalemit?" (Nehemia 2:7,8)

Qeveritarët mund ta pengonin Nehemian të arrinte në Jeruzalem. Ai kërkonte letra që t'i jepej lejkalimi. Po kështu, atij i nevojitej lëndë drusore për të rindërtuar portat dhe pjesët e tjera të qytetit. Sërish, mbreti tha, "Po." Perëndia kishte vepruar në zemrën e mbretit në mënyrë që ai të ishte i gatshëm për të dhënë miratimin. Nehemia ka thënë, "Mbreti më dha letrat, sepse dora mirëdashëse e Perëndisë tim ishte mbi mua." (Nehemia 2:8) Ai mori leje nga mbreti për të rindërtuar Jeruzalemin. Ai mori edhe letrat e duhura për lejkalim dhe sigurimin e lëndës drusore. Perëndia i ishte përgjigjur lutjes. Perëndia dëshiron që të paraqesësh gjithçka para Tij në lutjen tënde. Ai thotë, "M'u drejto kërkoi dhe unë do të të përgjigjem." (Jeremia 33:3)

Djem dhe vajza të krishtera! A do t'i lutesh Perëndisë ashtu sikundër thotë Ai në Fjalën e Tij? A do e lavdërosh Perëndinë çdo javë, duke i thënë prapësitë që ke bërë, për t'i kërkuar ndihmë për vete dhe të tjerët? Nehemia iu drejtua Perëndisë dhe Ai iu përgjigj në mënyrë të mrekullueshme. Zoti të thotë ty dhe mua sot, "Mu drejto dhe unë do të të përgjigjem." (Jeremia 33:3)

Dhe ti që nuk e ke Zotin Jezus Krishtin në zemrën tënde, a do i lutshi Atij që të jetë Zoti dhe Shpëtimtari yt? Vetëm Ai mund të falë mëkatet e tua e të bëjë ashtu sikundër dëshiron Ai. Mos voni të vish në gjirin e Tij. Kjo është lutja që Ai dëshiron ta bësh, "Zoti, më shpëto." Ai ka premtuar se kushdo që do vijë tek Ai, s'ka për ta refuzuar. Beso Jezus Krishtin dhe do shohësh se Ai është Zoti dhe Shpëtimtari yt i mrekullueshëm.

Mësimi 2

THIRRJA PËR T'U NGRITUR PËR TË NDËRTUAR

- Shkrimi i Shenjtë:** Nehemia 2:9-20
- E Vërteta Qendrore:** Perëndia ka një punë që duhet ta bëjnë të krishterët.
- Zbatimi:** **Të shpëtuarit:** Lejo Perëndinë të të drejtojë e të të përdorë.

Plani i mësimit

- Fillimi:** (Vështrim i drejtpërdrejtë)
- Figura: 1** Ç'ditë e madhe duhet të ketë qenë kur Nehemia u nis për udhëtim...
Udhëtimi për në Jeruzalem.
- 2 Nehemia mëson rreth gjendjes së qytetit. VQSH
 - 3 Sanbalati dhe Tobiahu inatosen. VQSH
Unë dhe ti jemi xhelozë dhe inatçinj.
Unë dhe ti kemi nevojë për Krishtin (për të shpëtuarit)
 - 4 Nehemia inspektion muret e qytetit gjatë natës.
Kostoja e punës së Zotit.
 - 5 "Le të ndërtojmë murin e Jeruzalemit".
Njerëzit janë dakord.
Armiqtë tallen.
- Pika kulmore:** "Perëndia e qiellit do na sigurojë suksesin. Ne, shërbëtorët e tij do ngrihem të ndërtojmë qytetin."
- Përfundimi:** Lëre Zotin të të drejtojë dhe të të përdorë.
Ai do të japë forcë e guxim.

Vargu përmendësh: "Zot, ç'don ti të bëj unë?" Veprat 9:6

Kur shpjegoni vargun që do mësohet përmendësh, vini në dukje se Sauli ishte nisur për në Damask për të kapur të krishterët. Befas, ai pa një dritë nga qielli dhe dëgjoji një zë të thoshte: "Saul, pse po më persekuton?" Kur e kuptoi se po i fliste Jezus Krishti, ai tha: "Zot, ç'don ti të bëj unë?" Ai e quajti Jezusin Perëndi dhe e lejoi Atë të marrë kontrollin e jetës së tij. Në atë çast Sauli u shpëtua, iu falën mëkatet dhe jeta e tij ndryshoi. Zoti Jezus do që të të shpëtojë dhe ndryshojë jetën tënde. Ti thjesht ki besim tek Ai dhe lejoje Atë që të marrë në kontroll jetën tënde.

Nëse dëshiron t'i besosh Krishtit, por nuk di si të veprosh, unë jam i gatshëm të bisedoj me ty për këtë çështje. Pra, nëse dëshiron të dish më shumë se si mund të shpëtosh, qëndro ulur në vendin tënd pas mbarimit të mësimit. Kur të shoh të ulur pas, mësimi, unë do të vij dhe do të të flas më shumë rreth të besuarit tek Krishti.

Mësimi

Figura 2 - 1

Ç'ditë e mrekullueshme duhet të ketë qenë kur Nehemia dhe burrat e tjerë u nisën për në Jeruzalem. Për këtë ditë ai ishte lutur me muaj të tërë. Mbreti e kishte lejuar të ndërtonte muret e qytetit. Dhe tani ishte koha që ata të nisnin udhëtimin për në Jeruzalem. Mendoni se sa i ngazëllyer duhet të ketë qenë Nehemia. E gjithë kjo ndodhi sepse, sikundër tha ai, "dora mirëdashëse e Perëndisë tim ishte mbi mua." (Nehemia 2:8)

Bibla thotë se mbreti dërgoi edhe disa ushtarë dhe oficerë me kuaj për t'i mbrojtur ata gjatë rrugës. (*Shiko Nehemia 2:9*) Ishte një udhëtim i gjatë, rreth 1,100 km. Populli i Shushanit duhet t'i ketë parë tek u nisën për udhëtim, me dyshimin nëse do arrinin në Jeruzalem. (*Shiko hartën*) Fillimisht ata duhet të kalonin Lumin Tigër dhe pastaj Lumin Eufrat.

(*Tregojini lumenjtë në hartë*)

Mbreti i kishte dhënë Nehemias letra për qeveritarët e provincave nëpërmjet të cilave ai do të kalonte. Urdhri i mbretit s'bëhej dysh. Ata u lejuan të kalonin. Dhe ata vazhduan udhëtimin. Çdo ditë e më tepër ata i afroreshin Jeruzalemit.

Figura 2 - 2

Më në fund pasi udhëtuan gati tre muaj, ata arritën në Judë. Atje që nga larg ata mund të shikonin format e mbetura të qytetit të Jeruzalemit. Sa mirënjohës ishin ata që Perëndia i kishte sjellë shëndoshë e mirë pas atij udhëtimi të gjatë. Ky ishte qyteti nga ku stërgjyshërit e tyre ishin marrë robër në dhe të huaj.

Kur Nehemia foli me popullin e Jeruzalemit, ai pa sa të shkurajuar që ishin ata. Ai nuk u tregoi atyre menjëherë qëllimin e ardhjes së tij. (*Shiko Nehemia 2:16*)

Ai donte të shihte gjendjen me sytë e vet.

Perëndia e kishte sjellë Nehemian në Jeruzalem të realizonte një detyrë të veçantë për Të. Perëndia ka një punë të veçantë që ti ta bësh, në se e ke vënë besimin tënd në Zotin Jezus Krisht. Perëndia mund të përdorë për të sjellë të tjerët të besojnë te Zoti Jezus. Ai mund të përdorë që të ndihmosh të krishterët e tjerë të rriten në jetën e krishterë. Ai ka një plan të përsosur për çdo ditë, pavarësisht nëse je në shtëpi, apo në shkollë ose duke luajtur. Ai mund të drejtojë drejt njerëzve që kanë nevojë. Nëse je i krishterë, a i kërkon Perëndisë të drejtojë sipas vullnetit të Tij të përsosur? Këngën korale të mëposhtme mund ta përdorësh si lutje:

"Perëndi, më përdor; ja tek jam, më përdor mua.
Dua që të më përdorni sa më shumë
Përmes rrugës apo përmes detit.
Perëndi, ja tek jam, më përdor mua."

Nehemia lejonte Zotin që ta drejtonte e ta përdorte.

Figura 2 - 3

Sidoqoftë, dy vetë ishin tërbuar nga inati nga kthimi i Nehemias. Ata ishin Sanbalati, guvernatori i Samarias dhe Tobiahu, guvernatori i Amonit. Ata i urrenin hebrenjtë dhe ata e kishin kuptuar se Nehemia kishte ardhur për të ndihmuar popullin. Ata nuk donin që Judea të forcohej sërish. Ata donin që vetëm provincat e tyre të ishin të fuqishme. Kështu, që ata ishin shumë të mërzitur.

Kur ne si të krishterë zbatojmë vullnetin e Perëndisë, ka njerëz që nuk e pëlqejnë veprimin tonë. Ata zemërohen kur shohin se unë dhe ti jemi ndryshe, sepse ne duam Zotin Jezus Krisht. Hera-herës ata veprojnë duke na dëmtuar librat apo biçikletën. Ngandonjëherë, ata iu flasin keq të tjerëve për ne. Ky është një fenomen që pritet të ndodhë. Nëse kishte njerëz që e urrenin Jezus Krishtin kur ishte në botën tonë, dihet

se ka njerëz që na urrejnë neve sot, sepse ne jemi dishepujt e tij. A do na pengojë kjo t'i flasim të tjerëve për Shpëtimtarin tonë? A do na pengojë kjo të ndihmojmë ata që kanë nevojë? Jo! Nehemia nuk lejoi që Sanbalati dhe Tobiahu ta pengonin në kryerjen e misionit të Perëndisë në Jeruzalem. T'i lutemi Perëndisë të na ndihmojë mua dhe ty që të punojmë për Të çdo ditë. Kur Mary Slessor filloi të jepte mësim në Dundee (Dëndi) për Jezus Krishtin, disa djem u orvatën ta frikësonin e ta dëmtonin atë. Por ajo vazhdoi mësimin për Jezus Krishtin. Më vonë, ajo vajti edhe si misionare në Afrikë.

Sanbalati dhe Tobiahu ishin kundër Nehemias. Ndoshta edhe ti mund të kesh pasur dikur xhelozin dhe inat për të krishterët. Ti dhe unë jemi mëkatarë. Vetëm Një është Ai që mund të heqë ndëshkimin për mëkatarët tona dhe të na bëjë të jetojmë ndryshe. Ai është Jezus Krishti. Ai vdiq i kryqëzuar për mëkatarët tona. Bibla thotë: "Krishti vdiq për të paudhët." (Romakëve 5:6) Ç'gjë e mrekullueshme! Ti mund të vish tek Shpëtimtari yt. Besoji Atij me gjithë shpirt dhe Ai do të të falë. Ai do ndryshojë jetën tënde.

Figura 2 - 4

Nehemia kishte tre ditë që ndodhej në Jeruzalem. Ai ende s'u kishte folur të tjerëve për planet e tij. Ai donte ta njihje vetë gjendjen. Si mund t'i inspektonte muret pa u vënë re nga të tjerët? Ai priti sa njerëzit i zuri gjumi. Pastaj me disa shokë të tij doli nga qyteti të shihte portat dhe muret. Ai pa me shumë kujdes rrënojat dhe pjesët e qytetit të mbetura më këmbë. Ishte një pamje të trishtueshme. Kishte vende që edhe kafshët që ata kishin hipur nuk mund të kalonin nga grumbujt e gurëve dhe plehrave. Por, Nehemia zbriti dhe eci në këmbë. Grupi i vogël i njerëzve filloi punën nga Porta e Luginës. Ngadalë-ngadalë ata kaluan përgjatë murit. Nehemia donte të dinte saktësisht atë që duhet të bënte.

Zoti Jezus ka folur për rëndësinë e mendimit me kujdes të asaj që ne të krishterët duhet të përballojmë. Ai ka thënë se nëse dikush dëshiron të ngrejë një kullë, ai së pari llogarit koston; ai dëshiron të jetë i sigurt në mbarimin e punës (Lluka 14:28-30). A e ke menduar se ç'ndodh kur vepro sipas dëshirës së Zotit? Do të thotë të vesh Perëndinë të parin, para kërkesave dhe dëshirave të tua. Ndoshta si i krishterë dëshiron ta kalosh mbrëmjen në shtëpi duke luajtur dhe Perëndia të thotë se është dikush në rrugë që kërkon ndihmën tënde. Çfarë do bësh? A do thoshe: "S'më bëhet vonë shumë për atë njeri," apo do thoshe: "Perëndi, unë dua të zbatoj vullnetin tuaj, pavarësisht nga çmimi"? Duke ndjekur Zotin dhe vullnetin e Tij, kuptojmë se Ai është i pari jo vetën në kohën tonë të lirë, por edhe në mënyrën si shpenzojmë paratë. Ti dhe unë nuk blejmë çdo gjë që dëshirojmë. Por ne lëmë Zotin të na drejtojë. Ne i kërkojmë Atij të na ndihmojë të japin një pjesë të parave tona në mënyrë që edhe të tjerët të kenë mundësi të dëgjojnë Ungjillin. Disa mendojnë se për Perëndinë kanë rëndësi vetëm gjërat e mëdha, si puna e misionarit apo predikimi. Në pjesën më të madhe të kohës, kryerja e punës së Perëndisë nënkupton të jesh besnik edhe në gjëra të vogla. Fjala vjen në ndihmën që mund t'i jepet shokut apo misionarit. Jo gjithmonë është e lehtë. Por, Perëndia do jetë me fëmijët e Tij sot, ashtu sikundër ishte me Nehemian shumë kohë më parë.

Nehemia inspektoi murin dhe portat. Ai pa se ç'duhet të bënte. Ishte një punë e madhe. Të nesërmen, ai do t'u fliste njerëzve për planet e tija.

Figura 2 - 5

Të nesërmen Nehemia thirri së bashku gjithë sundimtarët e popullit. Ai ju tha atyre: "Ju e shikoni gjendjen e mjeruar në të cilën ndodhemi: Jeruzalemi është shkatërruar dhe portat janë konsumuar nga zjarri! Ejani t'i rindërtojmë muret e Jeruzalemit dhe kështu

nuk do të jemi më të turpëruar!" (Nehemia 2:17) (Njerëzit që jetonin përreth Jeruzalemit talleshin me banorët e qytetit për shkak të mureve të rrënuara.)

Nehemia donte që ata të kuptonin nevojën e madhe për të bërë diçka. Ai nuk u orvat ta kryente punën i vetëm. Ai tha: "Le të bëjmë diçka së bashku, ju dhe unë." Perëndia do që ne të punojmë së bashku me njerëzit që e duan Atë. Dhe Nehemia i nxiti ata duke thënë: "Ejani, t'i rindërtojmë muret e Jeruzalemit."

Për t'i inkurajuar ai u tregoi atyre ndihmën e dhënë nga Zoti: "Mbreti Artakserks më tha të gjitha ç'kërkova, sepse dora mirëdashëse e Perëndisë tim ishte mbi mua." Ai u tregoi atyre se si mbreti kishte dhënë leje që të rindërtohen muret, se si ai i kishte dhënë Nehemias letrat e nevojshme për t'ia treguar qeveritarëve gjatë rrugës dhe autorizimin për të marrë lëndë drusore nga pylli i mbretit. Perëndia kishte bërë kaq shumë për ta dhe Ai me siguri që do t'i ndihmonte të rindërtonin murin. Nehemia priti reagimin e popullit. Do punonin tok me të apo do ta linin qytetin ashtu siç ishte?

Populli u përgjigj njëzëri "Të ngrihemi dhe t'i vihemi ndërtimit." (Nehemia 2:18) Ata ishin gati të fillonin punë. Mendoni sa i gëzuar që do ketë qenë Nehemia. Njerëzit kishin dëshirë të punonin së bashku.

Lajmi u hap si vetëtimë. Armiqtë e Hebrenjve dëgjuan se ata rindërtonin murin. Kur Sanbalati, Tobiahu dhe miku i tyre Geshemi morën lajmin, ata filluan të tallen e t'i përbuzin, duke thënë: "Çfarë po bëni? Mos doni vallë të ngrini krye kundër mbretit?" (Nehemia 2:19) Hebrenjtë nuk do ta kishin të lehtë punën që do nisnin. Megjithatë, Nehemia iu përgjigj armiqve: "Do të jetë vetë Perëndia i qiellit që do na sigurojë suksesin. Ne, shërbëtorët e tij, do të fillojmë ndërtimin, por për ju nuk do të ketë as pjesë, as të drejtë, as kujtim në Jeruzalem." (Nehemia 2:20). Nehemia ishte i vendosur të kryente

detyrën që i kishte dhënë Perëndia dhe asgjë dhe askush nuk do e ndalte atë në këtë drejtim.

Nëse je i krishterë, mund të lutesh: "Zot, çdo ti të bëj unë?" Perëndia ka edhe për ty një punë. Çdo ditë Perëndia mund të të përdorë si dëshmitar në shtëpi, shkollë apo në lojë. Lëre Zotin të të drejtojë e të të përdorë, sikundër bëri për Nehemian. Hera-herës do hasësh edhe në vështirësi. Kujto si talleshin armiqtë me Hebrenjtë. Drejtoju Perëndisë që të të japë fuqi e kurajë për të dëshmuar dhe punuar për Të. Ai do të të drejtojë që të jetosh për Të e do të të udhëheqë që të thuash fjalët e duhura.

Mësimi 3

NDËRTIMI I MUREVE DHE PËRBALLIMI I ARMIQVE

Shkrimi i Shenjtë:	Nehemia - kapitujt 3 dhe 4.
E vërteta Qendrore:	Ji gati të përballosh vështirësi të krijuara nga të tjerët.
Zbatimi:	Të shpëtuarit: Lutu Perëndisë të të ndihmojë. Kujto sa i madhërishtëm e i fuqishëm që është Ai.
Plani i mësimi:	
Fillimi:	Një djalë duke shëtitur në mal. I ati i thotë, "Të dalat janë mjete që na ndihmojnë të ngjitem malin.
Figura:	<ol style="list-style-type: none">1 Nehemia planifikon punën dhe inkurajon punëtorët. Perëndia ka punë për çdo i krishterë.2 Sanbaleti dhe Tobihahu tallen me Hebrenjtë. VQSH3 Armiqtë planifikojnë sulmin. Populli lutet dhe ruan qytetin. VQSH Njerëzit shkurajohen; kërcënimet e sulmit.4 Njerëzit vendosen për të ruajtur qytetin. Kujtoni Perëndinë e madh; Ai është i madhërishtëm e i fuqishëm. VQSH5 Një pjesë bëjnë roje, të tjerët punojnë duke mbajtur pranë armën e tyre. "Perëndia do luftojë për ne."
Pika kulmore:	Populli vazhdon punën.
Përfundimi:	Ç'është bënë kur të përballesh me vështirësi të krijuara nga të tjerët?
Vargu Përmendësh:	<i>"Në qoftë se Perëndia është me ne, kush mund të jetë kundër nesh?"</i> Romakëve 8:31

Mësim i shkurtër për fëmijët e pashpëtuar

Meqenëse mësimi është kryesisht për nxënësit e shpëtuar, ju lutem zhvilloni këtë mësim të shkurtër në fillim të programit. Mësimin mund ta ilustroni me Figurën 2 - 5.

Në mësimin e sotëm do mësojmë për rindërtimin e portave dhe mureve të Jeruzalemit. Është interesant fakti se porta e parë që përmendet në listë është Porta e

Deleve. (Nehemia 3:1) Ishte pranë tempullit në pjesën verilindore të Jeruzalemit. Delet që përdoreshin për flijim silleshin përmes kësaj dere.

"Porta e Deleve" na kujton Jezus Krishtin. Ai vdiq i kryqëzuar të paguante mëkatet tona. Ai u ngjall së vdekuri. Ai është Shpëtimtari i gjallë. Kjo është arsyeja pse Jezus Krishti ka thënë: "Unë jam dera; nëse dikush hyn nëpërmjet meje, do të shpëtohet; do të hyjë, do të dalë dhe do gjejë kullotë." (Gjoni 10:9)

Ka vetëm një rrugë që të shpëtoni nga mëkatet tuaja. Dhe ajo është të besoni Jezus Krishtin. Jezus Krishti është dera e shpëtimit për ju dhe mua.

Nëse do të të pyesja sot në cilën anë të derës së shpëtimit je, cila do ishte përgjigjja jote? Mos ende je jashtë saj? Apo ke kaluar portën dhe e di se je shpëtuar? Nëse nuk ke kaluar derën e shpëtimit, kërkoni Krishtin sot që të jetë Shpëtimtari dhe Zoti yt.

A e kupton se ti je një mëkatar, i cili bën gjëra që nuk duhet t'i bëjë? E kuptoni se Jezus Krishti është i vetmi Shpëtimtar, i vetmi që mund të të falë mëkatet dhe që mund të bëjë çfarë Ai dëshiron të bëjë? A do kalosh sot nga dera e shpëtimit në mbretërinë e Perëndisë? Ti ke nevojë ta pranosh Atë si Shpëtimtarin dhe Zotin tënd. Ti mund t'i thuash Atij që tani: "I dashur Zoti Jezus, unë e besoj se Ju vdiqët i kryqëzuar dhe u ngritët së vdekuri për mua. Tani unë ju pranoj si Shpëtimtarin dhe Zotin tim. Unë besoj se Ju do mi falni mëkatet për të shpëtuar shpirtin tim." Nga premtimi i Tij e di se ke shpëtuar. Ai thotë, "Unë jam dera; nëse dikush hyn nëpërmjet meje, do shpëtohet."

Shënim për mësuesin:

Para se të filloni mësimin, shpjegojini nxënësve se jeni në dispozicion të tyre për të biseduar me këdo që dëshiron të dijë më shumë për rrugët e shpëtimit apo kërkon ndihmë në jetën e krishterë. Caktoni një vend ku nxënësit mund të vijnë të këshillohen pas mësimit.

Mësimi

Hyrje

Një djalë i vogël kishte shkuar të shëtiste në mal me babanë e tij. Shpati ku po ngjiteshin ishte shumë i pjerrët. Ai kishte disa thepa të dalë. Fëmija iu kthye babait duke e

pyetur "Pse i ka bërë Perëndia malet me kaq shumë të dala?" Babai pasi u mendua disa minuta iu përgjigj të birit: "Të dalat janë mjeti me të cilin ne ngjitemi." Natyrisht, ai desh të thoshte se thepat ishin të nevojshëm për t'i ndihmuar ata t'i ngjiteshin malit përpjetë. Kështu është edhe në jetën e krishterë. Secili prej nesh has vështirësi, madje ka njerëz që edhe përpiqen të na dëmtojnë. Ne mund të pyesim pse i lejon Perëndia këto gjëra të ndodhin. Por, gjatë këtyre momenteve të vështira ne përftojme mësim të rëndësishme të jetës së krishterë. Ne mësojmë që t'i besojmë Perëndisë më shumë dhe të bëjmë çfarë Ai dëshiron. Perëndia na ndihmon kur ne përballohem me vështirësi dhe kur të tjerët na kundërvihen. Perëndia përdor vështirësitë për të na bërë t'i shëmbëllojmë më shumë asaj që Ai dëshiron të jemi. Mos harroni: "Të dalat janë mjeti që na ndihmojnë të ngjitemi."

Nehemia hasi vështirësi të shumta në zbatimin e vullnetit të Perëndisë. Tanimë e dimë si talleshin armiqtë me Hebrenjtë, thjesht sepse ata donin që të rindërtonin muret e Jeruzalemit. Nehemia i tha popullit të tij: "Vetë Perëndia i qiellit do të na sigurojë suksesin. Ne, shërbëtorët e tij, do të fillojmë ndërtimin." (Nehemia 2:20) Dhe kështu bënë.

Figura 3 - 1

Kishte shumë punë për të bërë. Rrënojat dhe portat e djegura duheshin spastruar. Gurët duheshin larë para se të përdroreshin sërish në ndërtim. Muret duheshin riparuar. Duheshin bërë portat me shule e lloze dhe duheshin montuar. Nuk ishte thjesht që secili mund të bënte ç'ti donte qejfi. Nehemia duhet të bënte një plan, në mënyrë që secili të punonte në vendin e caktuar. Perëndia e drejtoi Nehemian t'u kërkonte njerëzve të punonin në grupe në ata pjesë të murit që ishin afër shtëpisë së tyre. Puna afër shtëpisë ishte një lehtësi. Njerëzit që i kishin shtëpitë jashtë Jeruzalemit u ngarkuan të punojnë në ato pjesë të murit ku kishte pak shtëpi. Gjithsej ishin 42 grupe me

punëtorë. Disa ishin priftërinjtë e tempullit, disa argjendarë, disa shërbëtorë të tempullit, disa prodhues parfumeshe dhe disa të tjerë tregtarë. Çdo njeri ishte angazhuar në punë. Nehemia zgjodhi disa vetë të kujdeseshin për punën në pjesën e tyre të murit për t'u siguruar që puna të ecte mbarë. Ai dinte secilin ku punonte dhe shpesh ai i inkurajonte ata. Ai përmendte një njeri me emrin Baruk që punonte me zell të madh (Nehemia 3:20) Ai gjithashtu përmendte Tekoitët, banorët e një fshati 15 km. larg Jeruzalemit, të cilët riparuan dy sektorë të plotë të murit edhe pse udhëheqësit e tyre nuk deshën të ngrinin asnjë gur. (Nehemia 3:5,27).

E kujtoni se çfarë mësuam herën tjetër? "Perëndia ka punë për çdo të krishterë." Ai shpreson që ne të punojmë së bashku edhe me të krishterë të tjerë. Ai do që puna e Tij të bëhet sa më mirë që të jetë e mundur. Bibla thotë: "Dhe çdo gjë që të bëni, ta bëni me dëshirë të mirë, si për Perëndinë dhe jo për njerëzit, sepse ju i shërbeni Krishtit, Zotit." (Kolozianëve 3:23, 24) Në shtëpi me vëllanë, motrën apo babain e krishterë duhet të ndihmohesh në punët e shtëpisë dhe t'i bësh ato sikur i bën për Perëndinë. Tok me shokët e tu të krishterë në shkollë mund të dëshmosh për Jezus Krishtin, duke treguar shembuj nga jeta jote dhe duke pohuar me gojën tënde sa i mrekullueshëm është Shpëtimtari yt. Me lutjet dhe dhuratat e tua mund të ndihmohesh misionarët dhe të krishterët e tjerë për t'i dhënë njerëzve lajmin e mirë të Shpëtimtarit në të katër anët e botës. Çdo i krishterë ka rolin e tij në punën e Perëndisë, ashtu sikundër kohë më parë në Jeruzalem çdokush kishte punën e tij në ndërtimin e mureve.

Figura 3 - 2

Sidoqoftë, kishte disa njerëz që nuk donin rindërtimin e murit. Njeri prej tyre, Sanbalati, u tërbua nga inati kur mësoi si shkonte puna. Sanbalati ishte guvernatori i Samarisë. Atij i interesonte forcimi i pushtetit të vet dhe provincës që ai qeveriste. Ai filloi t'i

tallte Hebrejtë para njerëzve që ishin me të dhe para ushtrisë së Samarisë. Ai tha: "Ç'po bëjnë këta Judej matufë? Do të fortifikohen? Do të ofrojnë flijime? A do të mbarojnë brenda një dite? Mos vallë do të ringjallin gurët e konsumuar nga zjarri i togjeve të rrënojave?" (Nehemia 4:2)

Aty ndodhej edhe guvernatori i Amonit, Tobiah. Edhe ai u tall me Hebrejtë: "Le të ndërtojnë! Por në rast se një dhëlpër hipën sipër, do ta rrëzojë murin e tyre prej guri!" Të tjerët qeshën.

Gjithmonë ka njerëz që tallen me mua dhe ty kur ne bëjmë atë që dëshiron Perëndia. Ata thonë, "E ku është e mira që ju i përkisni Jezus Krishtit? S'keni për të arritur gjë duke u lutur e duke u folur të tjerëve për Krishtin! Është thjesht një humbje kohe!" Ata do tallen me ty, madje ashtu sikundër thotë Bibla, ata janë shumë të egër. Kjo është nga që ata nuk duan të besojnë te Zoti Jezus Krishti, ta lejojnë atë të ndryshojë jetën e tyre. A i ke folur ndonjë shoku për Jezus Krishtin dhe ai është tallur me ty? Ç'duhet të bësh?

Mësuesi lejon vetë nxënësit të përgjigjen. Mund të flisni rreth reagimeve të ndryshme të mundshme si

- a) të kthesh talljen me tallje;
- b) të qash dhe t'i thuash vetes se s'do flasësh me për Jezus Krishtin;
- c) t'i tregosh prindërve (*kjo mund të ndihmojë*);
- d) t'i thuash Perëndisë. (*Përgjigja më e mirë*) Dhe tani le të shohim se ç'thotë Bibla për mënyrën si veproi Nehemia. (*Le ta lexojmë*)

Nehemia nuk filloi të debatonte me këta njerëz. Ai as nuk ua ktheu fyerjet e tyre. Nehemia thjesht u lut dhe i kërkoi Perëndisë të përkujdeset për këtë çështje. Ai u lut: "Dëgjo, o Perëndia ynë, sepse na përçmojnë! Bëj që të bjerë në kokën e tyre fyerja e tyre ... sepse kanë provokuar zemërimin tënd para ndërtuesve." (Nehemia 4:4,5) Pra, sa herë që një i krishterë fyhet nga dikush tjetër, ai së pari duhet të lutet. Tregoji Perëndisë gjithçka, duke i kërkuar që Ai të kujdeset për atë punë. Nëse dikush del kundër vullnetit të Perëndisë,

ai duhet të përgjigjet para Tij. Mos humb kohë duke gjetur mënyra shpagimi. Lërja atë punë Perëndisë. Ai do bëjë atë që është e drejtë. Ndoshta dikush është tallur me ty thjesht sepse ti je i krishterë Tregoja Perëndisë dhe lëre gjithçka në dorën e tij. Mos lejo që të të pengojë në zbatimin e vullnetit të Perëndisë. Nehemia dhe shokët e tij mundën të vazhdonin punën, sepse problemin e talljeve ata ia besuan Perëndisë.

Bibla thotë se ata vazhduan ndërtimin "sepse populli e kishte marrë me zemër punën." (Nehemia 4:6) Ata e bënë gjithçka me shpirt dhe askush nuk mund t'i ndalte ata. Ata punonin çdo ditë duke vendosur gurët në vendet e tyre. Ishte një punë e madhe se muri rreth Jeruzalemit ishte rreth 4 km i gjatë. Populli kishte marrë zemër se kishte bërë gjysmën e punës.

Figura 3-3

Por, armiqtë nuk do hiqnin dorë kollaj. Ata u tërbuan që riparimet e murit po avanconin dhe të çarat po mbusheshin. Armiqtë përreth Jeruzalemit u mblodhën së bashku të planifikonin një sulm kundër qytetit. Ata ishin Sanbalati dhe Samaritanët në veri, Tobiahu dhe Amonitët në lindje, Geshemi dhe Arabët në jug dhe Asdodentët në perëndim. Qyteti i Jeruzalemit duhej rrethuar.

Cili ishte reagimi rreth këtij komploti që synonte të krijonte trazira e të rrethonte Jeruzalemin? Si mendo ti, si duhej të vepronin ata? Bibla thotë se njerëzit bënë dy veprime. Së pari ata u lutën, jo vetëm Nehemia, por të gjithë. Ata e dinin se pa Perëndinë gjendja do ishte e pashpresë. Ata u mbështetën te Perëndia dhe i kërkuan Atij t'i mbronte. Por, Nehemia bëri edhe një gjë tjetër. Ai zgjodhi disa vetë të ruanin qytetin ditë e natë.

Zoti Jezus e di që ne si të krishterë do të hasim në vështirësi të krijuar nga të tjerët. Njerëzit nuk dalin kundër nesh me shpata e heshta. Ata flasin e veprojnë në një mënyrë që të na hapin probleme. Ç'do bëje sikur një nga shokët do të të thoshte a) "T'i

po humbet shumë kënaqësi me që je i krishterë". Apo b) "Unë kam provuar të pi cigare, madje edhe drogë." Apo c) "Gjithkush po flet për videokasetën e re, me dhunë gjak, do vini ta shihni sonte tek ne." Apo d) "Është marrëzi të besosh se Perëndia krijoi gjithçka brenda gjashtë ditëve, në një kohë që mësuesi thotë se janë dashur miliona vjet."

(Lëreni fëmijët të përgjigjen. Ndhimojini ata të gjejnë përgjigjen e duhur për çdo problem.)

Zoti Jezus na ka thënë në Fjalën e Tij: "Rrini zgjuar dhe lutuni që të mos bini në tundim." (Mateu 26:4)

Hebrenjtë ishin lutur si dhe kishin zgjedhur njerëz të ruanin qytetin. Sidoqoftë, armiqtë e popullit Hebre ishin të vendosur të pengonin rindërtimin e murit. Ata vendosën të mos e sulmonin Jeruzalemin menjëherë. Nehemia duhej të përballonte edhe një problem tjetër. Populli kishte gati një muaj që kishte punuar pa pushim. Atyre iu duhej jo vetëm të punonin gjithë ditën në rindërtimin e murit, por disa prej tyre duhet të bënin roje ditë e natë. Të gjithë ishin shumë të lodhur. Disa prej tyre erdhën te Nehemia dhe i thanë atij: "Forcat e mbartësve të peshave vijnë duke u

pakësuar dhe gërmadhat janë aq të shumta sa nuk do arrijmë të ndërtojmë muret!" (Nehemia 4:10) Ata ishin shkurajuar. Ata përjetonin ndjenjën e braktisjes së punës. Por kishte edhe një problem tjetër: Sanbalati dhe miqtë e tij hapnin fjalë se ata do kryenin një sulm të befasishëm ndaj qytetit. Ata do të sulmonin nga të gjitha anët dhe do i vrisnin njerëzit. Bibla thotë se ky rrezik ishte paraqitur dhjetë herë rresht (Nehemia 4:12) Ç'kohë e vështirë që duhet të ketë qenë!

Figura 3 - 4

Nehemia e dinte se duhej të bënte diçka. Fillimisht, ai dërgoi disa njerëz që të bënin roje prapa murit në vendet që ishin më pak të ruajtura. Ata duhet të qëndronin së bashku si familje e të mbartin armë të ndryshme si shpata, heshta dhe harqe. Duke

e rishikuar situatën, Nehemia foli me popullin dhe udhëheqësit e tij. Ai ju tha atyre: "Mos keni frikë nga ata! Kujtoni Perëndinë; Ai është i madhërishëm e i plotfuqishëm. (Nehemia 4:14) Perëndinë do kujdesej për ta. Ai kishte bërë kaq shumë për ta.

Bibla thotë: "Në qoftë se Perëndia është me ne, kush mund të jetë kundër nesh?" (Romakëve 8:31) Perëndia i ndihmon të krishterët kur përballen me njerëz që janë kundër tyre. Ndoshta edhe në shkollë mund të jetë dikush që tallet me ty apo përpiket të të fyejë thjesht sepse ti beson te Zoti Jezus Krisht. Dy djem të krishterë shkonin në shkollë më autobus. Gati çdo ditë ata fyheshin nga fëmijë të tjerë dhe i detyronin ata t'i përsërisnin ato. Nuk ishte e lehtë të të vinin në lojë në këtë lloj mënyre. Djemtë u kujtuan se Perëndia ishte me ta dhe ata refuzuan të shqiptonin fjalë të pista. "Kujtoni Perëndinë. Ai është i madh dhe i fuqishëm."

Nehemia iu tha njerëzve të tij të bënin të njëjtën gjë. Ai i inkurajoi ata të ishin gati për luftë për të mbrojtur familjet dhe Jeruzalemin. Dhe ai ia doli mbanë. Lajmi arriti tek kundërshtarët se ata ishin gati për ndeshje. Armiku hoqi dorë nga ideja e një sulmi të fshehtë. Kështu, njerëzit iu kthyen punës së rindërtimit të mureve.

Figura 3 - 5

Që nga ajo ditë, Nehemia i ndante njerëzit në grupe. Një grup punonte te muret, ndërsa grupi tjetër bënte roje. Edhe ata që punonin mbartin armë me vete. Çdo ndërtues, gjatë punës ngjishte edhe shpatën. Meqenëse punëtorët ishin të shpërndarë, Nehemia mbante me vete një borizan për të paralajmëruar të tjerët në shenjën e parë të rrezikut. Ata e dinin se po të dëgjonin zërin e burisë, duhet të linin punën e të grumbulloheshin në një vend me Nehemian për të zbrapsur sulmin. Nehemia e dinte se ata nuk mund të luftonin armikun vetëm, por ai ishte i sigurt për ndihmën e Perëndisë.

Meqenëse, ai besonte te Perëndia, ai ishte në gjendje të thoshte: "Perëndia ynë do luftojë për ne." (Nehemia 4:20)

Nehemia dhe populli nuk hoqën dorë nga puna kur hasën në vështirësi. Bibla thotë se ata vazhdonin punë që herët në mëngjes deri natën vonë. Askush nuk e braktiste qytetin për t'u kthyer në mbrëmje në shtëpi. Ata qëndruan brenda mureve të Jeruzalemit për të mbrojtur qytetin së bashku. Kur Nehemia dhe rojet uleshin për pushim, nuk i hiqnin rrobat e trupit. Armët i mbanin me vete. Kështu, që në sinjalin e parë, ata ishin të gatshëm për mbrojtjen e qytetit. Perëndia ishte me ta për t'i ndihmuar.

Nëse beson Jezus Krishtin, Ai është pranë teje kur të tjerët të kundërvihen. Perëndia të thotë nëpërmjet kësaj pjesë të Fjalës së Tij se ç'duhet të bësh:

- kërkoji Perëndisë të të ndihmojë
- kujto sa i madh dhe i plotfuqishëm që është Zoti.

Ç'do të bësh nëse përballësh me vështirësi të krijuara nga të tjerët? Do heqësh dorë nga realizimi i asaj që dëshiron Perëndia? Bibla thotë: "Në qoftë se Perëndia është me ne, kush mund të jetë kundër nesh?" Pra, përgatitu të përballosh vështirësitë e krijuara nga të tjerët. Mos hiq dorë nga ajo që Perëndia dëshiron që ti të bësh. Ai do të të ndihmojë.

Mësimi 4

PERBALLIMI I PROBLEMEVE MIDIS NJERËZVE TË PERËNDISË

Shkrimi i Shenjtë:	Nehemia; kapitujt 5 dhe 6.
E Vërteta Qendrore:	Perëndia ndihmon fëmijët e Tij të bëhen të mençur.
Zbatimi:	Të shpëtuarit: Lexo Fjalën e Perëndisë. Kërkoji Perëndisë të të ndihmojë që të përgjigjesh në mënyrën e duhur.
Plani i mësimi:	
Hyrje:	Perëndia, tanimë kishte ndihmuar Nehemian dhe Hebrenjtë në shumë mënyra ... Sidoqoftë, vështirësi më të mëdha pritëshin të vinin.
Figura:	1 Njerëzit e varfër ankohen për mungesë ushqimesh, rritjen e interesit të huave të marra dhe shitjen e fëmijëve të tyre si skllëvër. 2 Nehemia flet kundër mëkateve të parisë. VQSH - shembulli i Josiahut. 3 Sanballati, Tobiahu dhe Geshemi dërgojnë lajm për t'u takuar me Nehemian. Ai refuzon të lërë punën dhe lutet. VQSH 4 Shemajahu përpiqet të frikësojë Nehemian që të fshihet në Tempullin e Shenjtë. Ai refuzon.
Pika kulmore:	5 Muri rreth Jeruzalemit përfundon. Perëndia e përfundoi atë.
Përfundimi:	Perëndia edhe në jetën tënde mund të bëjë gjëra të mëdha.
Vargu përmendsh:	<i>"M'u drejto dhe unë do të të përgjigjem."</i> Jeremia 33:3

Mësimi

Hyrje

Perëndia tashmë kishte ndihmuar Nehemian dhe Hebrenjtë në mënyra të ndryshme. Perëndia i ish përgjigjur lutjeve të Nehemias, duke ndikuar pozitivisht te mbreti i Persisë. Perëndia i kish ndihmuar të vinin në Jeruzalem shëndoshë e mirë. Perëndia i kishte mbrojtur kur armiqtë ishin orvatur t'i ndalonin. Perëndia i kishte ndihmuar të ripararin muret, që ishin gati gjysmë të mbaruar.

Figura 4 - 1

Sidoqoftë, vështirësitë më të mëdha pritëshin të vinin. Fillimisht, burrat e varfër dhe gratë e tyre erdhën dhe i thanë Nehemias: "Ne, bijtë tanë dhe bijat tona jemi shumë; prandaj të gjejmë grurë që mund të hamë dhe të jetojmë." (*Shiko Nehemia 5:2*) Kishte edhe një problem tjetër. Ata kishin lënë punën në fushë për të ndërtuar muret. Ata thanë: "S'kemi më para. Na duhet të marrim hua nga njerëzit e pasur për të blerë ushqim. Kemi marrë para hua për të paguar haraçin e

mbretit." (Nehemia 5:3,4) Çifutët e pasur u kërkonin më shumë para se borxhi që kishin. Kështu, Hebrenjve të varfër u duhej të fitonin para të tjera veç borxhit të marrë hua. P.sh., nëse dikush merrte hua 100 \$ duhet të paguante 120 \$.

Ata kishin edhe lajme të tjera të këqija për t'i treguar Nehemias: "Ndonëse mishi ynë është si mishi i vëllezërve tanë dhe bijtë tanë janë si bijtë e tyre, në realitet jemi të detyruar t'i kthejmë në skllavër bijtë tanë dhe bijat tona; disa nga bijat tona janë katandisur që tani në skllavëri dhe nuk kemi asnjë mundësi t'i shpengojmë, sepse arat dhe vreshtat tona janë në dorë të të tjerëve." (*Shiko Nehemia 5:5*) Kur dëgjoji njerëzit të ankoheshin për të tilla gjëra, Nehemia u indinjua shumë. Pse? Jo vetëm pse paria po tregohej e pangopur, e egër dhe egoiste, por para së gjithash se nuk po zbatonte urdhërimet e Perëndisë. Perëndia kishte thënë se ishte mëkat për popullin e Tij të kërkonte më shumë para seç kishte dhënë hua. (*Shiko Eksodi 22:25; Levitiku 25:36, 37*) Po kështu, çifuti nuk duhet të skllavëronte çifutin. (*Shiko Levitiku 25:39-42*) Kështu, paria e pasur e Jeruzalemit po mëkatonte kundër Perëndisë.

Perëndia mua dhe ty na ka treguar mënyrën e drejtë për të jetuar. Por edhe unë dhe ti s'kemi zbatuar urdhërimet e Perëndisë. Bibla thotë se unë dhe ti duhet të duam Perëndinë dhe të tjerët. Dhe shpesh unë dhe ti duam gjëra, si dhe duam veten më shumë seç duam Zotin. Shpesh jemi lakmitarë dhe egoistë. Nëse të ofrojnë kek, a e do pjesën më të madhe për vete? A ke pasur rast të gënjesht për të marrë një notë më të mirë në shkollë? A ke përvetësuar ndonjë send që s'ka qenë i yti? Ndoshta lodra apo të holla; ndoshta gomën apo stilolapsin e dikujt tjetër! Vetëm Njëri mund të falë mëkatet e tua, mund të ndryshojë jetën tënde. Ai është Zoti Jezus Krisht, i cili vdiq i kryqëzuar dhe u ngjall së vdekuri për të gjithë ne. Bibla thotë: "Besoni në Zotin Jezus Krisht dhe do të shpëtohesh." (Veprat e Apostujve 16:31)

Besoji Atij. Lutu Atij që të të shpëtojë. Premtimi është i vërtetë: Ai do të të shpëtojë. Ai do të falë mëkatet dhe do të bëjë ashtu siç dëshiron Ai. A dëshiron që Ai ta bëjë këtë për ty? Atëherë, kërkoja Atij që tani. Nëse besoni Zotin Jezus Krisht, Ai ka për të të shpëtuar që sot.

Figura 4 - 2

Nehemia u zemërua sepse njerëzit po mëkatonin kundër Perëndisë. (Zemërimi i Nehemias ishte i ligjshëm. Zemërimi ynë nuk është shpesh i përligjur.) Ai e mendoi mirë se ç'duhet të bënte. Perëndia i dha atij mençuri për të zgjidhur këtë situatë të vështirë. Ka rëndësi për ne që besojmë te Zoti Jezus Krisht, të presim prej Tij të na japë mençurinë si të veprojmë. Është fare e lehtë që unë dhe ti të veprojmë gabim, por Perëndia dëshiron të na drejtojë ditë për ditë. Nehemia i besoi Perëndisë t'i jepte mençuri. Ai i mbledhi të gjithë njerëzit që të dëgjonin atë që ai do bënte. Fillimisht, ai i tha parisë: "Ju po u kërkonin njerëzve më shumë para se ç'u keni dhënë hua. Ne luftuam shumë që të shpengonim njerëzit tanë dhe ju po i shisni ata sërish si skllavër." Dhe më tej ai vazhdoi: "Kjo që po bëni ju nuk është e drejtë. A nuk duhet të veproni sipas Fjalës së Perëndisë? Dhe ç'do thonë armiqtë tanë për këtë?" (*Shiko Nehemia 5:7-9*)

Mbreti Artakserksi e bëri Nehemian guvernator të Judës. Ai kishte 150 njerëz që punonin për të. "Dëgjoni", vazhdoi ai. "Unë, vëllezërit e mi dhe shërbëtorët e mi u kemi dhënë hua para dhe grurë. Ju lutem, të mos kërkojmë kamatë për këtë. A do veprosh edhe ti kështu?" (*Shiko Nehemia 5:10*)

Nehemia po vepronte sikundër i thoshte Fjala e Perëndisë. Ai nuk po i kërkonte parisë të bënte diçka të cilën ai nuk e bënte vetë. Ai vazhdoi fjalën e tij: "Ua ktheni që sot arat e tyre, vreshtat e tyre ullishtat dhe shtëpitë e tyre, dhe të një qindtën pjesë të parave." (Nehemia 5:11) Paria ndjehej e

turpëruar për atë që kishte bërë, sepse ajo menjëherë u përgjigj: "Do t'i kthejmë dhe nuk do kërkojmë asgjë prej tyre; do të veprojmë ashtu siç thua ti." (Nehemia 5:12) Nehemia kishte bërë atë që thotë Bibla, burim i mençurisë së vërtetë. Fjala e Perëndisë është gjithmonë e drejtë dhe e vërtetë. Edhe unë dhe ti bëhemi të ditur duke dëgjuar Fjalën e Perëndisë dhe duke vepruar në bazë të saj. Gjithçka që kemi nevojë të dimë rreth të jetuarit për Perëndinë ndodhet në Fjalën e tij. Për çdo të krishterë, Bibla është udhërrëfyese i jetës. A lexon çdo ditë pjesë nga Bibla? A përiqesh me ndihmën e Perëndisë të vësh në jetë ato që lexoni? S'ke për të gabuar kurrë nëse zbaton Fjalën e Perëndisë dhe vepron sikundër thotë Ai.

Gati 200 vjet më parë, një djalë i vogël me emrin Josia u bë mbret si mëkëmbës i atit të tij. I ati dhe mbretërit e tjerë para tij e kishin mësuar popullin që të adhuronin statuja në vend të Perëndisë së vërtetë dhe të gjallë. Josia ndjehej i trishtuar. Ai donte që populli të ndiqte rrugën e duhur. Një ditë një person gjeti në tempull një pjesë të Biblës dhe ia solli atë Josiajt. Ai i thirri njerëzit të dëgjonin Fjalën e Perëndisë. Ai tha: "Ne s'u jemi bindur urdhërimeve të Perëndisë dhe meritojmë ndëshkim." Ata i kërkuan Perëndisë falje dhe filluan të jetonin në bazë të Fjalës së Tij. Kjo solli ndryshime të mëdha në vend.

Perëndia është me të vërtetë i mençur dhe nëse zbaton Fjalën e Tij, do kesh zgjuarsi të vërtetë. Në Psalmet thuhet: "Kuptoj më shumë se të gjithë mësuesit e mi, sepse urdhërimet e tua janë përsiatja ime." (Psalmi 119:99) Duke ndjekur Fjalën e Perëndisë, ti do jesh më i mençur se të gjithë mësuesit në shkollë (me mençurinë e Perëndisë). Nehemia i kërkoj parisë të zbatonin Fjalën e Perëndisë, të jepnin fjalën se do kthenin gjithçka që kishin marrë. Dhe pastaj ai bëri një veprim të çuditshëm. Ai shkundi mantelin e gjatë që kishte veshur dhe tha: "Kështu Perëndia ta shkundë nga shtëpia e tij dhe nga

pasuria e tij cilindo që nuk do ta mbajë këtë premtim!" (Nehemia 5:13)

Njerëzit ishin të gëzuar. Paria mbajti fjalën e dhënë.

Figura 4 - 3

Dhe tani që Perëndia i kishte dhënë Nehemias zgjidhjen e problemit, njerëzit u kthyen në punë. Por armiqtë e njerëzve të Perëndisë nuk hiqnin dorë lehtë. Puna tani ishte gati e përfunduar. Njerëzit kishin rindërtuar muret. Mbeteshin të vendoseshin vetën portat e qytetit. Sanbalati, Tobiahu dhe Geshemi i dërguan Nehemias një mesazh: "Eja dhe takohemi bashkë në një nga fshatrat e luginës së Onos." (Nehemia 6:2) Ky ishte një vend 30 km. larg Jeruzalemit. Dukej sikur ata donin të takoheshin me Nehemian të bisedonin për paqe. Dukej një ftesë miqësore. Por Perëndia dinte se ç'po ndodhte. Ai i dha Nehemias mençurinë për të marrë vendimin e duhur. "Ata mendonin të më punonin një rreng," tha Nehemia. (Nehemia 6:2) Ata donin të diskreditonin figurën e Nehemias para popullit, madje edhe ta vrisnin atë.

Perëndia e ndihmoi Nehemian të përgjigjej në një mënyrë shumë të mençur. Ai u dërgoi Sanbalatit, Tobiahut dhe Geshemit një mesazh, në të cilin thuhej: "Jam duke bërë një punë të madhe dhe nuk mund të zbres. Pse duhet ta ndërpresim punën kur unë po e lë për të zbritur tek ju?" (Nehemia 6:3) Nehemia s'kishte për të lejuar njeri ta pengonte në punën që i kishte treguar Perëndia të bënte. Ata mund të vinin në Jeruzalem të bisedonin me të. Ai do vazhdonte punën e Perëndisë.

Ka shumë rëndësi për secilin nga ne besimtarët, të dimë se çfarë Perëndia do që të bëjmë ne. Shpesh njerëzit përreth nesh duan që unë dhe ti të bëjmë gjëra që nuk janë çfarë Perëndia dëshiron nga ne. Edhe shokët mund të na thonë: "Provo këtë lodër bixhozi: është zbavitje." "Merre këtë cigare; s'ka për të

të bërë dëm." "Shikoje këtë videokasetë." Pra, në raste të tilla ne duam ndihmën e Perëndisë për të thonë "jo", ashtu sikundër Nehemia refuzoi që të shmangej nga puna e Perëndisë. Kërkoji ndihmë Perëndisë për të dhënë përgjigjen e duhur. Ai i ndihmon fëmijët e tij të jenë të mençur.

Katër herë armiqtë i dërguan Nehemias të njëjtin mesazh dhe çdo herë Nehemia iu përgjigj njësoj. Ai refuzoi të shkonte tek ata. Kur e kuptuan se ai nuk largohej nga Jeruzalemi, ata provuan diçka tjetër. Kësaj here, kur Nehemias i erdhi letra e pestë, letra ishte lënë hapur me qëllim. Ata mendonin se letrën do ta lexonin shumë njerëz. Letra shkruante: "Është përhapur fjala midis kombeve dhe Gashmu e pohon këtë, që ti dhe Judejtë po kurdisni një rebelim; prandaj sipas këtyre zërave, ti po rindërton muret, për t'u bërë mbret i tyre, dhe ke caktuar madje profetët për të bërë shpalljen tënde në Jeruzalem, duke thënë ka një mbret në Judë! Tani këto gjëra do t'i njoftohen mbretit. Prandaj eja dhe të këshillohemi bashkë." (Nehemia 6:6,7) Edhe një herë Perëndia e ndihmoi Nehemian të përgjigjej në mënyrën e duhur. Ai u dërgoi thjesht një mesazh që lexonte: "Punët nuk janë ashtu siç thua ti, por ti i shpik në mendjen tënde." (Nehemia 6:8) Dhe Nehemia bëri atë që ne e kemi parë shpesh të bëjë. Ai u lut, "Prandaj tani, o Perëndi, forco duart e mia!" (Nehemia 6:9) Ai e dinte se kishte nevojë për ndihmën e Perëndisë tani që armiqtë e tij po orvateshin ta dekurajonin e ta frikësonin. Perëndia e dëgjoi dhe iu përgjigj lutjes së tij.

Figura 4 - 4

Armiqtë u orvatën sërish ta mashtronin Nehemian. Një njëri me emrin Shemajah që jetonte në Jeruzalem, pretendonte se kishte frikë nga armiqtë. Ai u kyç brenda në shtëpi dhe i çoi fjalë Nehemias të vinte ta shihte. Shemajahu i tha Nehemias se Perëndia i kishte dhënë një mesazh për të: "Takohemi brenda në shtëpinë e Perëndisë,

brenda tempullit dhe mbyllim portat e tempullit, sepse ata do të vijnë natën të të vrasin." (Nehemia 6:10) Perëndia e ndihmoi Nehemian të kuptonte se Shemajah po gënjente. Dhe ai u përgjigj: "A mundet një njeri si unë të marrë arratinë?" (Nehemia 6:11) Nehemia, sikundër edhe njerëzit e tjerë e dinte se në tempull lejohej të hynte vetëm prifti. Nëse hynte dikush tjetër, Perëndia kishte thënë se ai do vdiste. (*Shiko Numrat 18:7*) Nehemia nuk ishte prift, prandaj ai e dinte se kjo ishte një rreng tjetër. Tobiahu dhe Sanbalata e kishin paguar Shemajahun të frikësonte Nehemian. Ata donin që Nehemia të dilte kundër urdhërimeve të Perëndisë. Në këtë mënyrë ata do ta diskreditonin para popullit të Jeruzalemit. Ne e dimë se ç'është e drejtë për t'u bërë kur i kërkojmë Perëndisë të na drejtojë e të na ndihmojë kur lexojmë Fjalën e Tij.

Nehemia i besoi Zotit kur armiqtë e tij u orvatën ta mashtronin. Perëndia e ndihmoi atë të vepronte me mençuri, duke marrë vendimin e duhur. Ka njerëz që na kritikojnë sepse jemi të krishterë. Ata thonë për ne gjëra të paqena. Ata mund të thonë se ke kopjuar në provim, kur e vërteta është ndryshe. Unë dhe ti duhet t'i kërkojmë Perëndisë të na ndihmojë të përgjigjemi në mënyrën e duhur. Është gabim që unë dhe ti të kërkojmë të hakmerremi apo të përhapim thashetheme për të tjerët. Perëndia është në gjendje t'i zgjidhë punët. Unë dhe ti duhet të vazhdojmë të bëjmë atë që është e drejtë. Kështu, të tjerët do shohin se akuzat e ngritura kundër meje dhe teje kanë qenë gënjeshtër. (*Shiko 1 Pjetri 2:12,15*)

Figura 4 - 5

Perëndia e ndihmoi Nehemian t'u përgjigjej armiqve në mënyrën e duhur. Dhe më në fund erdhi lajmi i gëzuar: "Muret ishin përfunduar." Çdo gur ishte vendosur në vendin e vet. Ishin mbyllur të çarat si dhe ishin montuar portat. Kjo punë kishte përfunduar brenda 52 ditëve. Perëndia kishte ndihmuar

njerëzit të bënin një punë të madhe brenda një kohe shumë të shkurtër.

Natyrisht, kishte një domethënie të madhe që gjithë njerëzit kishin marrë pjesë në rindërtimin e mureve. Kjo punë s'do shkonte kaq mirë, pa pjesëmarrjen e gjithë popullit. Po kështu, puna ishte planifikuar dhe organizuar mirë. Njerëzit kishin të gjitha materialet që nevojiteshin. Ajo që kishte më shumë rëndësi, me ta kishte qenë edhe Perëndia. Sa të lumtur duhet të jenë ndjerë njerëzit kur panë muret dhe portat që përbënin një mbrojtje të mirë kundër çdo sulmi armik.

Armiqtë e popullit ishin të mërzitur. Ata s'lanë gur pa lëvizur të pengonin punën, por nuk arritën. Tani atyre ju duhej të pranonin: "Këtë punë e bëri Perëndia. Ndryshe, nuk ka si shpjegohet." (*Shiko Nehemia 6:16*)

Njerëzit vinin nga të gjithë anët për të parë muret që ishin ngritur sërish rreth Jeruzalemit. Populli i Jeruzalemit thoshte: "Perëndia na ndihmoi." Perëndia na dha Nehemian, një udhëheqës të mirë. Perëndia na përmbushi të gjitha kërkesat dhe na zgjidhi të gjitha problemet." A nuk është kjo një dëshmi e mrekullueshme e madhësisë së Perëndisë!

Nëse je i krishterë, Perëndia të drejton çdo ditë. Ai i ndihmon fëmijët e Tij të jenë të mençur. Lexo fjalën e Tij - Biblën. Kërkoji Atij të të ndihmojë të veprosh drejtë. Ai është Zoti dhe Shpëtimtari i mrekullueshëm. T'i s'ke për t'u zhgënjyer nëse i beson dhe zbaton Fjalën e Tij.

Mësimi 5

QYTETI I PËRKUSHTUAR PERËNDISË

Shkrimi i shenjtë: Nehemias - kapitujt 7-13.

E Vërteta Qendrore: Lëre Zotin të kontrollojë jetën tënde.

Zbatimi: **Të pashpëtuarit:** Prano Jezus Krishtin si Shpëtimtarin tënd.
Të shpëtuarit: Zbato Fjalën e Tij; kërkoji Perëndisë falje; bëj punën e Tij; gëzohu me Të; jepja veten Perëndisë.

Plani i Mësimit:

Fillimi: Charles Studd ka thënë: "Perëndia ka marrë gjithçka timen." VQ

Figura:

- 1 Njerëzit dëgjojnë Fjalën e Perëndisë.
VQSH Zbato Fjalën e Perëndisë.
- 2 Ata i kërkojnë Perëndisë falje.
VQSH Prano mëkatet e tua.
Festa e faltoreve.
- 3 Njerëzit punojnë në Jeruzalem - roje, këngëtarët, Levitët
VQSH Puno për Perëndinë.
- 4 Njerëzit punonin në rindërtimin e mureve dhe lavdëronin Perëndinë.
VQSH Lavdëro Perëndinë.
- 5 Nehemia sigurohet se gjithçka po kryhet sipas vullnetit të Perëndisë.
VQSH dorëzoju Perëndisë.

Pika kulmore: "Perëndia ka marrë gjithçka timen."
Përfundimi: Në ç'drejtim i orientoi Zoti njerëzit?
A ndodh edhe kjo me ty?
A e ke pranuar Jezus Krishtin si Shpëtimtarin tënd?

Vargu përmendësh: "Askush nuk mund t'u shërbejë dy zotërinjve." Mateu 6:24

Mjete të tjera vizive: Gjatë mësimit mund të "zbuloni" një nga një gurët viziv që janë në fund të manualit. Gurët mbulojini me letër të bardhë, të fiksuar me pineska ngjyrë blu.

Mësimi

Hyrje

Charles Studd ishte një misionar, të cilin Perëndia i sillte shumë njerëz që besonin

te Krishti në Angli, Kinë, Indi dhe Afrikë. Një ditë një Pastor e pyeti Charles Studdin për të fshehtë të jetës së tij dhe ai iu përgjigj: "E fshehta është se Perëndia ka marrë gjithçka timen." Perëndia do të kontrollojë çdo pjesë të jetës tonë. A ke pjesë të jetës që doni ta mbash vetëm për vete? Lëre Perëndinë të kontrollojë jetën tënde, në mënyrë që të

thuash: "Perëndia ka marrë gjithçka timen." Sot ne do mësojmë se si populli i Jeruzalemit mësoi të zbatonte vullnetin e Perëndisë dhe e lejoi Atë të drejtonte jetën e tij.

Figura 5 - 1

Disa ditë pas përfundimit të murit, njerëzit u mbloodhën që të gjithë në Jeruzalem. Ata u mbloodhën në një shesh para Portës së Ujërave. Ata i kërkuan Ezdras t'u lexonte pjesë nga Ligji i Perëndisë. Ezdra kishte filluar t'u mësonte njerëzve Fjalën e Perëndisë. Bibla thotë: "Në të vërtetë Ezdra i ishte kushtuar me gjithë zemër të studionte ligjin e Perëndisë, ta zbatonte në praktikë dhe të mësonte në Izrael statutet dhe dekretet." (Ezdra 7:10) Dëshira e Ezdras ishte të mësonte Fjalën e Perëndisë, ta zbatonte atë dhe t'ua mësonte atë të tjerëve.

Në shesh ishte ngritur një platformë ku qëndronte Ezdra, në mënyrë që njerëzit të kishin mundësi ta shihnin e ta dëgjonin. Ndërsa hapi pergamenën, të gjithë njerëzit u ngritën më këmbë për të respektuar Fjalën e Perëndisë. Në shesh kishte rreth 40,000 burra, gra e fëmijë që dëgjonin Ligjin e Perëndisë. (*Shiko Nehemia 7:66,67*)

Ezdra lexoi Fjalën e Perëndisë, ndërsa 13 vetë të tjerë e ndihmonin atë, duke sqaruar kuptimin e kësaj fjale. Njerëzit dëgjonin me kujdes Fjalën e Perëndisë që nga mëngjesi deri në mesditë. Ç'ditë e mrekullueshme!

Nëse ke pranuar Jezus Krishtin si Zotin dhe Shpëtimtarin tënd, duhet të dëgjosh me kujdes Fjalën e Biblës.

(*Mësuesi zbulon gurin e parë të murit viziv.*)

Lexo çdo ditë vargje nga Bibla. Vëri në jetë menjëherë ato që mëson. Perëndia do ti ndihmojë të veprosh ashtu siç thotë Bibla. Kur u lexojnë apo u shpjegojnë Biblën në kishë apo shkollë, dëgjoje atë me kujdes. Bibla nuk është një libër i thjeshtë. Bibla është Fjala e Perëndisë, ajo çfarë Perëndia do që ti të njohësh dhe të bësh.

Figura 5 - 2

Njerëzit jo vetëm dëgjonin Fjalën e Perëndisë, por ata edhe e zbatonin atë. Ata e kishin kuptuar se nuk kishin jetuar në bazë të vullnetit të Perëndisë. Ata derdhnin lot për mëkatet e bëra. Ata ndjenin keqardhje që nuk i ishin bindur Perëndisë ashtu siç duhej. Perëndia i kishte zgjedhur ata të ishin njerëzit e Tij, por ata dëshironin të ishin si njerëzit e tjerë paganë. Ata kryen veprime që i kryejnë njerëzit jobesimtarë. Tek dëgjonin Fjalën e Perëndisë, ata e kuptuan se veprimet e tyre ishin të gabuara. Ata nuk po u bindeshin urdhërimeve të Perëndisë. Bibla thotë: " Ata qëndronin dhe pranonin mëkatet e tyre." (Nehemia 9:2)

Kjo është ajo që të thotë Perëndia të bësh kur nuk i bindesh urdhërimeve të Tij. A ke qenë në shoqërinë e fëmijëve të pashpëtuar? A shkon me ta të shikosh filma e videokaseta të papërshtatshme? A përdor fjalë të pista? A thua fjalë që Perëndia nuk dëshiron t'i thuash? A vepron e vishesh si shokët e tu të pashpëtuar për t'ju bërë qejfin atyre dhe jo Perëndisë? Bibla thotë se kush i fsheh shkeljet e tij nuk do ketë mbarësi; por ai që i rrëfen dhe i braktis ato, ka për të fituar mëshirë. (*Shiko Fjalët e Urta 28:13*) Nëse dëshiron që Perëndia të ketë në kontroll jetën tënde, duhet t'i tregosh atij të gjitha paudhësitë. (*Mësuesi zbulon gurin e dytë të murit vizual*)

Ai do të të falë mëkatet, sikundër ka premtuar (I Gjoni 1:9) Ai do të të japë fuqi t'ju thuash "Jo" gjërave në jetë që bien ndesh me vullnetin e Perëndisë. (Romakëve 6:12,13) Jezus Krishti është në gjendje të na falë, mua dhe ty, të na japë forcën e duhur të jetojmë për Të, sepse Ai vdiq dhe u ngrit së vdekuri për mua dhe ty. Perëndia është në gjendje të punojë në jetën tonë, ashtu sikundër bëri në jetën e popullit të Tij në Jeruzalem shumë kohë më parë.

Figura 5-3

Ende kishte shumë punë për të bërë në Jeruzalem. Shumë shtëpi duheshin riparuar, shumë të tjera duheshin ndërtuar nga e para. Bibla thotë: "Qyteti ishte i madh dhe i gjerë, por brenda tij kishte pak njerëz dhe nuk ndërtoheshin shtëpi." (Nehemia 7:4) Kishte rëndësi që më shumë njerëz të jetonin në Jeruzalem se në fshatrat përreth. Jeruzalemi do të bëhej një qytet i veçantë, ku njerëzit mund të vinin të adhuronin Perëndinë e vërtetë. Pra, ai duhej populluar. Fillimisht, paria i ndërtoi e para shtëpitë në Jeruzalem. Pastaj, u vendos që një në dhjetë familje duhet të lëvizte në Jeruzalem.

Perëndia e drejtoi Nehemian t'u jepte disa njerëzve detyra të veçanta. (*Shiko Nehemia 7:1-3*) Nehemia vuri në komandë të Jeruzalemit vëllanë e tij bashkë me Hananiahun, qeveritarin e fortesës. E kujtoni që ishte Hanani i pari që i solli Nehemias lajmin se muret e Jeruzalemit ishin shembur. Bibla thotë për Hananiahun: "Ishte njeri besnik dhe kishte frikë nga Perëndia më tepër se shumë të tjerë." (Nehemia 7:2) Kjo ishte arsyeja pse ai mund të besohej të bënte një punë kaq të rëndësishme për Perëndinë. Ah, sikur Perëndia të na bëjë besnikë dhe që Ai të zërë vendin e parë në jetën tonë!

Nehemia u sigurua se ishin caktuar rojet e nevojshme për të mbrojtur qytetin. Të tjerët ishin ngarkuar me detyrën e hapjes dhe mbylljes së portave, në mënyrë që armiku të mos vinte fshehurazi. Ishte ngritur edhe një kor i veçantë, që drejtonte njerëzit në lavdërimin dhe falënderimin e Perëndisë. Levitët ishin ngarkuar të kujdeseshin për tempullin, shtëpinë e Perëndisë. Secili grup kishte drejtuesin e vet. (Nehemia 11:21-24)

Nëse je i krishterë, duhet të punosh për Perëndinë. (*Mësuesi zbulon gurin e tretë viziv*) Kjo nuk do të thotë se çdo i krishterë duhet të jetë misionar ose pastor. Por, ti mund të bësh detyrat shkollore për nder të Perëndisë. Mund të ndihmosh në aktivitetet e ndryshme që organizon shkolla. Me këngën ti inkurajon të tjerët të lavdërojnë Perëndinë. Ti

mund të bësh punë shtëpiake, për të lehtësuar barrën e nënës tënde. Mund të ndihmosh njerëzit e moshuar, apo njerëzit e sëmurë. Nëse do që Perëndia të marrë në kontroll jetën tënde, kërkoji Atij punë që të ndihmosh të krishterë tjerët. Çdo i krishterë duhet të jetë një vegël e Perëndisë për ta përdorur kurdo dhe kudo që Ai dëshiron. Jo të gjitha veglat kryejnë të njëjtin funksion. Çekiçi është ndryshe nga pinca. Edhe unë dhe ti mund të jemi ndryshe nga njeri tjetri. Por, secili ka rëndësinë e vet dhe gjithë së bashku ne i shërbejmë Perëndisë tonë.

Figura 5 - 4

Muret u ndërtuan. Populli kishte dëgjuar dhe zbatuar Fjalën e Perëndisë. Ata i kishin kërkuar Perëndisë falje për mëkatet e tyre dhe kishin rregulluar jetën e tyre. Në Jeruzalem njerëzit u ngarkuan me detyra të veçanta. Dhe tani ishte koha për të lavdëruar së bashku Perëndinë për gjithçka që Ai kishte bërë si dhe të shpallej publikisht se Jeruzalemi ishte qyteti i zgjedhur i Perëndisë. U caktua një ditë për festimet e mëdha. (Nehemia 11:27-47)

Njerëzit erdhën nga mbarë Juda. Erdhën këngëtarë e muzikantë. Erdhën edhe Levitët që kishin detyrë të ruanin tempullin e të adhuronin Perëndinë. Nehemia i ndau njerëzit në dy grupe. Secili grup duhet të shkonte në krye të murit e të ecte rreth qytetit. Ezra me një grup shkoi në të djathtë, kurse Nehemia me grupin tjetër shkoi në të majtë. Tek ecnin ata falënderonin dhe lavdëronin Perëndinë. Ata këndonin lavde për Perëndinë, duke i shoqëruar me instrumente muzikore. Ç' varg i mrekullueshëm që ishte gjatë gjithë rrugës rreth qytetit. Së fundi, të dy grupet iu afruan tempullit. Dy grupet koriste hynë në shtëpinë e Perëndisë, të pasuar nga të tjerët. Bibla thotë: "Këngëtarët kënduan me zë të lartë. Atë ditë ofruan fljime të mëdha dhe u gëzuan sepse Perëndia i kishte mbushur me gëzim të madh. Edhe gratë dhe fëmijët u

gëzuan; dhe gëzimi i Jeruzalemit dëgjohej nga larg." (Nehemia 12:42,43)

Ti dhe unë që njohim Jezus Krishtin si Perëndinë dhe Shpëtimtarin tonë, duhet ta lavdërojmë Atë për madhësinë dhe veprën e tij. Perëndia pëlqen të dëgjojë lavdërimet dhe falënderimet e fëmijëve sot, ashtu siç pëlqente në Jeruzalem shumë kohë më parë. Perëndia është kaq i madhërisëm dhe kaq i mirë. Ai na krijoi ty dhe mua, dhe botën e bukur ku ne jetojmë. Ai çoi Birin e Tij të vdiste për mua dhe ty i kryqëzuar dhe Ai e ngriti së vdekuri në ditën e tretë. Ai na ka bekuar dhe na u është përgjigjur lutjeve tona. Ne kemi kaq shumë arsye ta lavdërojmë e ta falënderojmë Atë.

(Mësuesi zbulon gurin e katërt viziv.)

Populli i Jeruzalemit bëri edhe diçka tjetër për të demonstruar dashurinë ndaj Perëndisë dhe për të treguar se ata i përkisnin Atij. Ata sollën dhurata për ata që kishin pjesë të veçantë në adhurim dhe shërbesën ndaj Perëndisë. Dashuria jonë për Perëndinë duket edhe te dhuratat që kemi sjellë për të ndihmuar ata që sot i shërbejnë Perëndisë. Kjo është pjesë e ofrimeve tona ndaj Perëndisë për gjithë mirësinë e Tij ndaj nesh.

A ka jeta jote pjesë nga ky lavdërim, falënderim dhe gëzim? Unë dhe ti jetojmë në një botë ku një numër i mirë njerëzish janë të mjerë e të pakënaqur. Si të krishterë unë dhe ti jemi ndryshe. Të tjerët duhet ta kenë të qartë se unë dhe ti kemi në shpirt dashurinë dhe gëzimin e Perëndisë. Kur mblidhemi bashkë duhet të lavdërojmë e të falënderojmë Perëndinë, t'i ofrojmë Atij gjithçka. Ka njerëz që mendojnë se të krishterët janë të zymtë e turivarur. Jo, Bibla thotë ndryshe: "Gëzimi i Perëndisë është fuqia juaj." (Nehemia 8:10)

Figura 5 - 5

Perëndia punoi në mënyrë të mrekullueshme mes njerëzve të Jeruzalemit. Ata kishin premtuar të ndiqnin dhe të zbatonin

urdhërimet e Tij. (Nehemia 9:38) Ata kishin thënë se nuk do ishin si njerëzit paganë që i rrethoni dhe se nuk do lidheshin në martesë me ta." (Nehemia 9:2) Nehemia vazhdoi drejtimin e popullit për 12 vjet rresht. (Nehemia 5:4; 13:6) Pastaj ai duhej të kthehej në pallatin e mbretit Artakserks, sikundër kishte premtuar. (Nehemia 2:6) Ne nuk e dimë sa gjatë qëndroi në Persi. Më vonë, ai kërkoi leje nga mbreti dhe u kthye sërish në Jeruzalem. Atje, ai mësoi një veprim të gabuar që kishte bërë prifti Eliashib. Ai i kishte dhënë Tobiahut dhoma në ndërtesën që ishte pjesë e tempullit. Ju e mbani mend se Tobiahu ishte një nga njerëzit që s'kishte lënë gjë pa bërë për të penguar ndërtimin e mureve të Jeruzalemit. Atje ai ishte në një dhomë në shtëpinë e Perëndisë. Nehemia s'donte që ky mëkat kundër Perëndisë të vazhdonte më gjatë. Ai ja nxori Tobiahut plaçkat përjashta. Ai dha urdhër të Zbatohej Fjala e Perëndisë që dhoma të pastrohej e të bëhej e përshtatshme për përdorim. Pastaj, në të ai futi pajisjet që shërbenin për shërbesën ndaj Perëndisë që kishin qenë aty më parë. Tempulli ishte për shërbim ndaj Perëndisë. Jeta ime dhe jote si të krishterë i takon tërësisht Perëndisë.

Në atë kohë, Nehemia pa që njerëzit punonin edhe ditën e shtunë, ditën që Perëndia u kish thënë të pushonin. Po atë ditë, ata sillnin në qytet ushqime, duke e përdorur të shtunën si ditë pazari. Nehemia ndërpreu pazarin, mbylli portën e qytetit dhe urdhëroi Levitët t'i mbanin ato mbyllur ditën e shtunë. Nëse lejojmë Perëndinë të marrë kontrollin e jetës tonë, Ai duhet të vijë i pari në gjithçka që bëjmë. Unë dhe ti duhet ta kënaqim atë.

Pas kësaj Nehemias iu desh të merrej me ata njerëz që martoheshin me gra nga fiset e tjera pagane. Kjo do i çonte ata të adhuronin idhujt. Fëmijët e tyre nuk dinin të flisnin gjuhën e Judeas. Sërish, Nehemia u ngrit kundër mëkateve të tyre dhe i bëri ata që t'i braktisnin këto martesë të gabuara. Nëse unë dhe ti duam që Perëndia të marrë nën

kontroll jetën tonë, duhet të heqim dorë nga gjëra që bien ndesh me vullnetin e Tij. Jezusi ka thënë: "Askush nuk mund t'u shërbejë dy zotërinjve; ju nuk mund t'i shërbeni Perëndisë dhe mamonit." (Mateu 6:24) Jeta jote duhet t'i kushtohet tërësisht Perëndisë. Perëndia fal gjithçka. *(Mësuesi zbulon gurin e pestë viziv)* Lëreni Perëndinë të kontrollojë çdo ditë jetën tënde, që edhe ti si Charles Studdi mund të thuash: "Perëndia ka marrë gjithçka timen."

Përfundimi

Ku e drejtoi Perëndia Nehemian dhe popullin e tij, ku na drejton Perëndia mua dhe ty, në mënyrë që jeta jonë e krishterë të ndërtohet në përputhje me vullnetin e Tij?

- të dëgjoj e të zbatoj Fjalën e Perëndisë.
- të pranoj mëkatet e të rregulloj gjërat në vend.
- të punoj për Perëndinë.
- të lavdëroj Perëndinë dhe të gëzohem për Të.
- t'i jepem Perëndisë tërësisht për të kryer vullnetin e Tij.

A qëndron kjo realisht edhe për ty?
Ndoshta, ti nuk e ke pranuar kurrë Zotin Jezus Krisht si Shpëtimtarin tënd. Nëse e di se keni mëkatuar dhe s'ke jetuar për Perëndinë, eja që sot në gjirin e Tij. Lutu të të falë e të të shpëtojë nga mëkati. Bibla thotë: "Të gjithë atyre që e pranuan, ai u dha pushtetin të bëhen bij të Perëndisë, atyre që besojnë në emrin e tij." (Gjoni 1:12).

<i>Dorëzoja veten tënde Perëndisë</i>	
<i>Puno për Perëndinë</i>	<i>Lavdëro Perëndinë</i>
<i>Bindu Fjalës së Perëndisë</i>	<i>Kërkoj Perëndisë të të falë</i>